

2012-imi Aningaasanut Inatsisissatut siunnersuutip sananeranut atatillugu inuussutisarsiuutigalugu piniartut ukiumut akileraaruteqaataasussanik 150.000 koruunit ataalugit isertitaqartartut allanut ilinniarteqqinnissaannut atugassanik aningaasaleeqqullugit, taakku annertunerusumik inuussutisarsiuutinut allanut isertitaqarfiunerusinnaasunut ikaarsaariarsinnaalersillugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Niels Thomsen, Demokraatit)

Akissuteqaat

(Inuussutisarsiornermut Aatsitassanullu Naalakkersuisoq)

Siullermeerinninneq

Siunnersuummut qujanaq. Ajornartorsiut Niels Thomsenip saqqummiussaa nunatta ineriartornissaanut pingaaruteqarpoq aammalu inuiaqatigiinni annikinnerusumik isertitallit ilinniarteqqinnissaat suliassaavoq unamminartoq uanga Naalakkersuisutut assut pingaartitara.

Niels Thomsen nassuiaaneratulut ilumoorpoq piniartut aalisartullu ilinniaqqinnissaannut attuumassuteqartunik ullumikkut suliniuteqartoqanngimmat, taamaattorli piginnaanngorsaqqinnissamut ilinniaqqinnissamullu periarfissanik arlalinnik peqarpoq *aamma* piniartunit aalisartunillu atorneqarsinnaasunik.

Ilaatigut Piareersarfimmi ilinniarsimanngitsunut nalinginnaasumik piginnaanngorsaasoqartarpoq, ilaatigullu ”Ilinniarsimanngitsut piginnaasaannik ineriartortitsinissamut suliniut”-ip (PKU) ataani akeqanngitsumik pikkorissarnissamut periarfissaqarpoq, taanna aqutugalugu aalisartut Uummannami Piniarnermik Aalisarnermillu Ilinniarfimmi piginnaanngorsaataasumik aamma pikkorissarsinnaallutik.

Suliniutit pingasut tamarmik piginnaanngorsaannissamik ilinniartitseqqinnissamillu imallit Naalakkersuisoqarfiup sapaatip akunnerani matumani ingerlappai:

1. Nuttarnerulersitsiniarluni tapiissutinut maanna aaqqissuussinerit, piginnaanngorsaqqiineq piginnaasanillu ineriartortitsinermut suliniutit ataanni pikkorissarnerit maanna nutarterneqarput aaqqissuussinerni siunertarineqartut anguneqarsimanersut immaqalu qanoq pitsanngorsarneqarsinnaanersut nalilersorniarlugit, tassunga ilanngullugu piniartut aalisartullu neqeroorutigineqartunik atuinissamut periarfissaqarnersut nalilersorniarlugu.
2. Piniartut aalisartullu aammalu allat inuussutisarsiornikkut isertitakitsut ilinniaqqinnissamut piginnaanngorsarnissamullu periarfissinniarlugit **Nunap immikkoortuisa ineriartortinnissaannut periusissamut** atatillugu suleqatigiissitaliaq ajornartorsiutinik arlalinnik paasisaqarpoq, piniartut, aalisartut allallu isertitakitsut ilinniartitseqqinnermut piginnaanngorsaqqinnernullu;- sulisoqarnissamik pisariaqartitsiviusuni, suliffeqarnikkullu ineriartorfiusuni peqataatinneqalissappata iluarsineqaaqartariaqartunik.

3. Taamaattumik ilinniartitseqqinnissaq eqqarsaatigalugu siunnersuinissaq qitiutillugu nunatsinni suliffissaaleqisut immikkut suliniuteqarfiginissaannut 2011-mi aningaasanut inatsimmi ilassutitut aningaasaliissuteqartoqarnissaa Naalakkersuisut ulluni makkunani qinnuteqaatissanik suliaqarput Iliuseqarnissamut pilersaarut maanna suliarineqalerpoq aammali suliniutit siuliani taaneqartut ataatsimut aqqiiviginiarneqarnissaat ilanngunneqassalluni.

Taamaattumik qulaani pineqartut tunngavigalugit Naalakkersuisut siunnersuutip itigartinneqarnissaa inassutigaa.